

# ESDRAS

## (Édra)

**Āëxgacü ga Chíru nanaxunagü nax wena naxügüãxüçax ga Tupanapata**

**1** <sup>1</sup>Rü gumá taunecü ga nagu āëxgacü yangucuchicü ga Chíru ga Pérchiaanecüãxarü āëxgacü, rü Cori ya Tupana nayanguxëxë ga norü ore ga noxri Yeremíagxwa nüxü yaxuxü. Rü yemaçax ga nüma ga Tupana rü āëxgacü ga Chíruãëwa ínananguxëxë nax guxü ga nachixüanegü ga nüma namaxã inacuáxümaxã naxunagüaxüçax ga nhaa ore ga ümatüxü ga nhaxü: <sup>2</sup>“Rü chama i Chíru i Pérchiaanecüãxarü āëxgacü rü chanaxunagü i nhaa ore. Rü nüma ya dauxüçüax ya Cori ya Tupana rü marü çaxmëxwa nanangëmagüxëxë i guxüma i nachixüanegü i nhama i naanewa ngëxmagüxü. Rü choxü namu nax naxçax chanaxüçax ya wüxi ya napata nawa ya yima íane ya Yerucharéü i Yudáanewa ngëxmane. <sup>3</sup>Rü ngëmacax i guxãma i pema ya Yudáanecüãxgü ixígiuxe, rü name nixí nax Yerucharéüçax pewoëguxü nax wena penaxügüçax ya napata ya yimá perü Tupana. ¡Rü nüma pexü nangüxëxë

nawa i ngëma puracü! <sup>4</sup>Rü yíxema petanüxügü ya tama woëguchaüxe, rü name nixí i naxchirumaxã, rü tûmawexümaxã, rü õnamaxã nüxü tariungüxëë i ngëma woëguxü. Rü naétü rü name nixí i nüxna tanaxã i tûmaarü âmare naxçax ya Tupanapata ya Yerucharéüwa wena tá naxügüne”, nhanagürü ga āëxgacü ga Chíru.

**Yudáanecüãxgü rü wena Yerucharéüçax nawoëgu**

<sup>5</sup>Rü nüma ya Tupana rü yema Yudátanüxüarü rü Bëyamítanüxüarü āëxgacügüãëwa rü chacherdótegüãëwa nananguxëxë ga wüxi ga ngüçau nax Yerucharéüçax nawoëgüçax nax wena naxügüãxüçax ga Tupanapata. <sup>6</sup>Rü yema Yudáanecüãxgü ga tama Yerucharéüçax woëguchaüxü, rü yema woëguxüxü narüngüxëëgü diërumaxã, rü úrumaxã, rü wocagümaxã rü norü yemaxügü ga tatanüxümaxã. Rü naétü nüxna nanaxägü ga âmaregü Tupanapataçax. <sup>7</sup>Rü nümatama ga āëxgacü ga Chíru rü nanawoëguxëxë ga yema cópugü ga úirunaxçax rü guxüma ga togüamachigü ga Tupanapataarü

yemaxũgũ ga ãẽxgacũ ga  
Nabucodonochó Yerucharéũwa naxũ rü  
norü tupanapatagu yanuxũ. <sup>8</sup>Rü nüma  
ga Chíru ga Pérchiaanecũãxarũ ãẽxgacũ  
rü norü diêruarũ daruxũ ga  
Mitradáchixũ namu nax  
Yudáanecũãxarũ ãẽxgacũ ga  
Chebacháрана nanaãxũcax ga yema  
Tupanapataarũ yemaxũgũ.

.....

<sup>11</sup>Rü yema Tupanapataarũ yemaxũgũ  
ga úirunaxcax rü diêrumünaxcax rü  
5,400 nixĩ ga norü mu. Rü guxũma ga  
yema yemaxũgũ rü Chebachára nayana  
ga yexguma Babiróniaanewa  
natáeguxgu namaxã ga yema duũxũgũ  
ga Yerucharéũcax woeguxũ.

.....

**Yudáanecũãxgũ ga  
Babiróniaanewa woeguxũ**

**2** <sup>64-65</sup>Rü 42,360 nixĩ ga norü mu ga  
yema Yudáanecũãxgũ ga woeguxũ.  
Notürü tama yematanügu nixugũ ga  
norü puracütanüxũgũ rü naxũtaxũgũ ga  
7,337 ga duũxũgũ ixĩgũxũ. Rü  
yexgumarũxũ ta nayexmagũ ga 200 ga  
wiyaetanüxũ ga yatũxũ rü ngexũgũ.  
<sup>66-67</sup>Rü 736 ga cowarugũ nüxũ  
nayexmagũ, rü 245 ga múlagũ, rü 435  
ga camérugũ rü 6,720 ga búrugũ. <sup>68</sup>Rü  
yexguma Yerucharéũwa nangugũgu ga  
yema Yudáanecũãxgũ, rü nhuxre ga  
norü ãẽxgacũgũ rü norü ãmaregũ  
inaxãgũ nax wena Cori ya Tupanapata  
namexêégũxũcax. <sup>69</sup>Rü yema wüxichigũ  
nüxũ tauxchaxũ ga diêru nixĩ ga  
inaxãgũxũ naxcax ga guma Tupanapata.  
Rü 488 quíru naguxũ ga úiru, rü 2,750  
quíru ga diêrumü, rü 100 ga

chacherdótegũchiru ga mámxũ nixĩ ga  
inaxãgũxũ. <sup>70</sup>Rü yema chacherdótegu rü  
yema Lewítanüxũgũ rü nhuxre ga yema  
togü ga duũxũgũ rü yexma  
Yerucharéũgu naxãchiũgũ. Notürü yema  
wiyaetanüxũgũ, rü yema Tupanapataarũ  
ĩãxarũ daruũgũ, rü yema Tupanapatawa  
puracüexũ, rü yema togü ga  
Iraéutanüxũgũ rü wüxichigũ norü  
ĩanewa ningugüetanü.

**Yerucharéũwa rü wena inanaxügu  
nax Tupanacax nangutaquexegũxũ**

**3** <sup>1</sup>Rü yexguma 7 ga tauemaciwa  
nanguxgu nax Babiróniaanewa ne  
naxĩxũ rü nüma ga Iraéutanüxũgũ ga  
norü ãanewachigũ ngugũxũ rü  
Yerucharéũwa naxĩ nax yéma  
yangutaquexegũxũcax. <sup>2</sup>Rü yemacax ga  
Yuchué ga Yochadáchi nane rü  
namücügũ ga chacherdóteguĩmaxã rü  
Chorobabé ga Charatié nane rü  
natanüxũgũmaxã wenaxarũ nanaxügũ  
ga Tupaanaarũ ãmarearũ guchicaxũ nax  
yéma ínaguaxũcax ga Tupaanaarũ  
ãmaregũ, yema mugũ ga Moiché  
ümatüxũ nüxũ ixuxürũxũ. <sup>3</sup>Rü yema  
Tupaanaarũ ãmarearũ guchicaxũ rü  
nüxĩraxũxũ ga nachicagutama nanaxügũ  
rü meama natai. Rü yema nax naxcax  
namuüexũ ga yema duũxũgũ ga yema  
naanewa yexmagũxũ, rü yemacax  
guxũguma ga pañmama rü yáuanecü rü  
Cori ya Tupanacax ínanagugũxũ ga norü  
ãmaregũ. <sup>4</sup>Rü yema Moiché ümatüxũ ga  
mugũ nüxũ ixuxürũxũ rü  
nanaxüchigagũxũ ga yema naixatümaxã  
nügũ nax yaxüpataxũ. Rü guxũma ga  
ngunexũgu rü ínanaguuxũ ga ãmaregũ  
aixrügumarüũtama yema Moiché

ümatüxü ga mugü nüxü ixuxüxü. <sup>5</sup>Rü yexgumarüxü ta ínanagu ga ãmaregü ga ngüxchigaarü ngunexügu íguxü, rü yema ãmaregü ga yexwaca ixücutü ga tauemacügu íguxü, rü yema ãmaregü ga togü ga petagu Tupanacax íguxü. Rü yexgumarüxü ta ínanagu ga yema ãmaregü ga texé tümaarü ngüchaümaxã Tupanacax íxãmaregüxü. <sup>6</sup>Rü yema nax Tupanacax ínaguaxü ga ãmaregü, rü ínanaxügüe meama 7 ga tauemacüarü ügügu naxüpa nax inachixëëgüaxü ga yema naxtapüx ga guma Tupanapata. <sup>7</sup>Rü nhuxüchi naxcax nadaugü ga ípataarü üruügu ga nutaarü nhaxcurüügu rü corapínagü, rü diërumaxã nüxü nanaxütanü. Rü Líbanuanewa ga Tíruwa rü Chidáüwa naxcax nataxegü ga mürapewa ga ocayiwaügü. Rü yema mürapewa rü õnamaxã, rü wíumaxã, rü oríwaarü chíxümaxã nanaxütanügü. Rü yema mürapewagü rü Líbanuanewa nixí ga ne nanaaxü. Rü márpechinügu nayana nhuxmata Yópearü türewa nangugü, yerü yemaacü nixí ga nüxna naxãgaxü ga Pérchiaanecüãxaru ãëxgacü ga Chíru.

**Inanaxügüe ga wena nax  
naxügüãxü ga Tupanapata**

<sup>8</sup>Rü nüma ga Chorobabé ga Charatíe nane rü Yuchué ga Yochadáchi nane rü nüma ga chacherdótegü rü Lewítanüxügü rü guxüma ga yema Iraéutanüxügü ga wenaxarü Yerucharéücax woeguxü rü ínanaxügüe ga yema puracü nax wena namexëëgüaxü ga Tupanapata. Rü yema puracü rü ínaxügü ga yexguma marü taxre ga taunecü ínguxgu rü naétü taxre

ga tauemacü yixíxgu ga Yerucharéüwa nax nayexmagüxü. Rü yema puracümaxã inacuaxgü ga yema Lewítanüxü ga 20 ga taunecüarü yexera nüxü yexmagüxü. <sup>9</sup>Rü nüma ga Yuchué rü nanegü rü naeneegü rü nügü nade, rü wüxítücumü nügümaxã naxü namaxã ga Camierü rü nanegü ga Yudátaagü íxíngüxü. Rü yexgumarüxü ta nügütanüwa nanaxügüxëxë ga Enadáchi nanegü rü naeneegü rü natanüxügü ga Lewítaagü íxíngüxü. Rü nümagü nixí ga namaxã inacuáxü ga yema Tupanapataarü mexëëruügu. <sup>10</sup>Rü yexguma yema Tupanapataarü mexëëruügu nanucuxgu ga nüxíraxücü ga nutagü ga natapüxparagü nawa rütogüne, rü nüma gachacherdótegü rü mea nügü nangaxãëácüma yexma nachigü rü nayacue ga norü cornétagü. Rü yema Lewítanüxü ga Achátaagü rü yéma nanana ga norü paxetaruügu ga namaxã Tupanaxü yacuaxüügüxü, yema ãëxgacü ga Dawí unagüxüxü. <sup>11</sup>Rü nhuxre ga nümagü rü nawiyaegü rü Tupanaxü nicuaxüxügü. Rü yema togü rü nanangãxügü rü nhanagürügü: —¡Nüxna moxë pexã ya Cori ya Tupana erü nüma rü tamaxã namecüma rü ngëma norü ngechaü i taxcax rü taguma nagux! —nhanagürügü. Rü guxüma ga duüxügü rü nataãxëgü, rü tagaacü Cori ya Tupanaxü nicuaxüxügü, yerü marü ínaxügü ga nax wena namexëëxü ga Cori ya Tupanapata. <sup>12</sup>Rü muxüma ga yema chacherdótegü rü Lewítanüxü rü ãëxgacügü ga iyaxü ga marü nüxü daugüxü ga guma nüxíraxüne ga Tupanapata, rü yemagü rü tagaacü naxauxe, yerü nüxü nadaugü ga wena

nax inaxügüxü ga guma yexwacaxüne  
ga Tupanapata. Rü yexgumarüxü ta ga  
togü rü norü taãxëmaxä tagaãcü aita  
naxügü. <sup>13</sup>Rü yemaacü taxüema nüxü  
tacuax rü nataãxëgü rüexna  
nangechaügü yerü yema auxexü rü  
yema taãxëgüxü rü wüxigu aita naxüe  
rü yáxüguma nüxü naxinë.

**Norü uanügü ínayachaxächigüxëxë  
nax naxügüaxü ga guma  
Tupanapata**

**4** <sup>1-2</sup>Rü yexguma yema norü uanügü  
nüxü cuaxgügu nax wena  
namexëëgüaxü ga guma Tupanapata ga  
yema duüxügü ga Yudátanüxü rü  
Bëyamítanüxü ga Babiróniaanewa ne  
ixü ga Yerucharëücüax woeguxü, rü  
nüma ga norü uanügü rü  
Chorobabëxütawa rü Yuchuëxütawa rü  
yema togü ga ãëxgacügüxütawa  
ínayadaugü. Rü nhanagürügü nüxü:  
—¡Tauxü i toxna penachuxuxü nax pexü  
tarüngüxëëgüxü nawa i nhaa puracü!  
Erü toma rü ta pexruxü nüxü tayaxögü  
ya yimá perü Tupana. Rü naxcax  
ítanaguuxü ga torü ãmaregü ga  
yexguma Achíriaanearü ãëxgacü ga  
Echaradóü nua toxü gagügumama  
—nhanagürügü. <sup>3</sup>Notürü nüma ga  
Chorobabé rü Yuchuë rü yema togü ga  
ãëxgacügü ga iyaxü, rü nanangãxügü rü  
nhanagürügü: —Taxucürüwama  
pemaxä wüxigu tanaxü ya daa torü  
Tupanapata. Rü marü toxicatátama  
tanaxü ya napata ya Cori ya torü  
Tupana, yerü yemaacü nixü ga tomaxä  
nüxü yaxuxü ya Chíru ya  
Pérchiaanecüãxaru ãëxgacü  
—nhanagürügü. <sup>4</sup>Rü yexguma ga nüma

ga yema uanügü ga yema naanegu  
ãchiügüxü rü inanaxügüe nax chixri  
yema Iraéutanüxügüchiga yadexagüxü  
nax íyachaxächigüxüçax ga yema  
puracü.

.....

<sup>8</sup>Rü yexguma Artayére rü  
Pérchiaanecüãxaru ãëxgacü yixíxgu, rü  
yema Iraéutanüxügüaru uanügüaru  
ãëxgacü ga Reü rü nanamu ga norü  
poperaarü úmatüruxü ga Chíchái nax  
Artayérexütawa namuaxü ga wüxi ga  
popera ga chixexü tümachiga ga  
guxema Yerucharëücüãxgü ga nhaxü:  
.....

<sup>12</sup>“Rü cuxü nüxü tacuaxëxë, Pa  
Ãëxgacüx, rü ngëma Yudégu ya  
Iraéutanüxügü ga Yerucharëücüax  
woeguxü ga Babiróniaanewa ne íxü, rü  
nhuxmax rü wena nanamexëëgü ya  
yima norü íane i ngëma duüxügü i  
taxúega ínüexü rü chixexü ügüxü. Rü  
marü inanaxügüe nax namexëëgüaxü i  
norü íanearü poxeguxütapüx rü marü  
nananucu ga norü Tupanapataarü  
nutagü ya natapüxparagü nawa  
rütogüne”, nhaxü.

.....

<sup>17</sup>Rü yexguma nüma ga ãëxgacü ga  
Artayére nayaxuxgu ga yema popera, rü  
nanangãxü rü nhanagürü: “Pa  
Ãëxgacüx, Pa Reüx, rü yimá cumucü ya  
Chíchái ya poperaarü úmatüruxü, rü  
ngëma cumücügü i íane ya Chamáriawa  
ngëxmagüxü, rü guxüma i cumücügü i  
taxtü i Eufrátëarü oéstewa ngëxmagüxü,  
rü pexü charümoxë. <sup>18</sup>Rü ngëma perü  
popera i chauxcax nua pemuxü rü marü  
chaxütawa nangu rü ngëmaacü nüxü  
chacuax i perü ore i chamaxä nüxü

pexuxũ. <sup>19</sup>Rũ marũ chanamu i chorũ  
 ngũxẽerũũgũ nax poperatanũgu naxçax  
 nadaugũũçax i nachiga i ngẽma  
 duũxũgũ i Yerucharẽucũãx. Rũ yema  
 poperawa rũ nũxũ nayangaugũ nax  
 ngẽma nũxũ yaxuxũ nax aixcuma yixixũ  
 rũ ngẽma duũxũgũ rũ yema  
 nũxĩraxũgũxũ ga Pérchiaanecũãxaru  
 ãẽxgacũgũçax nũgũ nanutaquexegũxũ  
 nax nũgũ namaxã nadaixũçax, yerũ  
 tama yema ãẽxgacũgũga naxĩniechãũ.  
<sup>20</sup>Rũ ngẽxgumarũxũ ta nũxũ itayangau  
 rũ nũxcũmaxũchima rũ nayexmagũ ga  
 norũ ãẽxgacũgũ ga iporaxũchixũ ga  
 namaxã icuãxũ ga guxũma ga naanegũ i  
 taxtũ i Eufrátẽaru oẽstewaama  
 ngẽxmagũxũ. Rũ yema naanegũcũãx ga  
 naxmẽxwa yexmagũxũ rũ nũxũ  
 nanaxũtanũgũ ga taxũ ga diẽru. <sup>21</sup>Rũ  
 ngẽmacax chanaxwãxe nax  
 ípẽyachaxãchitanũxẽxũ i ngẽma  
 duũxũgũ i norũ ãanearũ mexẽewa  
 puracũxũ, nhũxmatáta wena nũxna  
 chaxãga nax ngẽma puracũ  
 naxũgũxũçax. <sup>22</sup>Rũ tama name nax  
 ngẽma nũxũ perũdaunũmarexũ erũ taxũ  
 i guxchaxũ tá çaxũçax ínanguxẽẽgũ i  
 ngẽma duũxũgũ ega tama nũxna  
 pedãxgu”, nhanagũrũ ga norũ  
 poperawa. <sup>23</sup>Rũ yexguma naxũtawa  
 nanguxgu ga yema ãẽxgacũ ga  
 Artayẽrearũ popera, rũ Reũ rũ Chĩchái  
 ga poperaarũ ũmatũruxũ, rũ namũcũgũ  
 rũ nũxũ nadaumatũgũ. Rũ  
 yexgumatama ga guxũma ga nũmagũ rũ  
 Yerucharẽũwa naxĩ, rũ nuãci  
 Yudẽugũxũ namu nax  
 íyachaxãchigũxũçax nax napuracũxũ.  
<sup>24</sup>Rũ yemaacũ nixĩ ga íyachaxãchixũ ga  
 Tupanapataarũ mexẽxẽ ga

Yerucharẽũwa. Rũ tama nawa  
 napuracũe nhũxmata Darũ taxre ga  
 taunecũ inguxẽxẽ nax ãẽxgacũ yixixũ ga  
 Pérchiaanewa.

**Wena inanaxũgũe ga puracũ  
 Tupanapata nax namexẽẽgũxũ**

**5** <sup>1</sup>Rũ nũma ga Tupanaarũ orearũ  
 urũgũ ga Ayéu rũ Yacaría ga Ídu  
 nane, rũ yema Yudẽugũ (ga  
 Iraéutanũxũgũ) ga Yudaanecũãxmaxã, rũ  
 Yerucharẽucũãxmaxã nũxũ nayarũxugũe  
 ga yema ore ga Cori ya Tupana namaxã  
 nũxũ ixuxũ. <sup>2</sup>Rũ yexguma ga Chorobabẽ  
 ga Charatié nane rũ Yuchué ga  
 Yochadáchi nane rũ wenaxarũ  
 inanaxũgũe ga nax nawa napuracũxũ ga  
 Tupanapataarũ mexẽxẽ ga Yerucharẽũwa.  
 Rũ nũma ga Tupanaarũ orearũ urũgũ rũ  
 ta nũxũ narũngũxẽẽgũ. <sup>3-4</sup>Notũrũ nũma  
 ga Tanái ga taxtũ ga Eufrátẽaru  
 oẽstewaamaarũ ãẽxgacũ, rũ nũma ga  
 Chetáru-Bonái rũ namũcũgũ, rũ  
 Yerucharẽũwa naxĩ rũ Yudẽugũna  
 nayacagũ rũ nhanagũrũgũ: —¿Texẽ pexũ  
 tamu nax wena penamexẽẽxũ ya daa  
 Tupanapata rũ nax peyamexẽẽgũxũ i  
 norũ poxeguxũ ya daa ãane?  
 —nhanagũrũgũ. Rũ nhũxũchi naxçax  
 ínaca ga tũmaéga ga guxema  
 Tupanapataarũ mexẽewa puracũixe.  
<sup>5</sup>Notũrũ nũma ga Tupana rũ nũxna  
 nadau ga yema Yudẽugũ ga yema  
 puracũmaxã icuãxgũxũ. Rũ yemaacũ  
 nataxuma ga texẽ nũxna nachũxuxũ nax  
 napuracũeamaxũçax. Rũ yoxni ga yema  
 Yudẽugũaru uanũgũ rũ  
 Pérchiaanecũãxaru ãẽxgacũ ga Darũçax  
 nanaxũmatũ ga wũxi ga popera nax  
 nũma namexẽẽãxũçax ga yema guxchaxũ.



**6** <sup>1</sup>Rü yexguma ga nüma ga ãëxgacü ga Darü rü norü duüxügüxü namu ga naxçax nax nadaugüxüçax ga yema mugüpane ga Chíru ümatüxü natanügu ga nüxcümaüxü ga poperagü ga Babiróniaanewa yexmagüxü. <sup>2</sup>Rü yema popera ga nagu naxümatüxü ga yema Chíruarü mugü rü nüxü inayangaugü nagu ga guma ãëxgacüpata ga ñane ga Ebatánawa yexmane ga Médiaanewa. <sup>3</sup>Rü yema mu ga yema poperagu ümatüxü rü nhanagürü: “Gumá nüxífraxücü ga tauncü nagu ãëxgacü yixücü ga Chíru rü nhaxü ga mu naxunagü: ‘Rü guma Tupanapata ga Yerucharéüwa yexmane ga Yudéugü norü ãmare ga naxüna nawa ígugüxüne, rü tanaxwaxe i wena namexëxë, rü yima naparagü rü mea inapugü. Rü ngëma norü máchane rü 27 i métruarü ngäxü tá nixí, rü ngëma norü tachiü rü 27 i métruarü ngäxü tá nixí. <sup>4</sup>Rü natapüxaru ügü rü tamaepüxchimüxü ya nutagü ya itacü tá nixí. Rü yimaéüwa rü ngexwacaxüxü i mürapewa i yaxcüxü tá nixüchigü. Rü chorü diëruarü daruxü tá nixí i naxütanüxü i guxüma i ngëma puracü. <sup>5</sup>Rü Tupanapataarü yemaxügü i úirunaxçax rü diërumünaxçax ga Nabucudonochó Tupanapatawa dexü, rü tanaxwaxe i Yerucharéüçax tanawoeguxëxë rü nagu tayanu ya yima Tupanapata ya wena tá üxüne, erü woetama ngëma nixí i nachica’” nhanagürü ga yema Chíruarü poperawa. <sup>6</sup>Rü yexguma ga nüma ga Pérchiaanecüãxaru ãëxgacü ga Darü rü nanaxümatü ga wüxi ga popera naxçax ga Tanái ga taxtü ga Eufrátearü oéstewaamaarü ãëxgacü, rü

Chetáru-Bonái rü norü ngüxëëruügü ga ãëxgacügü ixígüxü ga yema naanewa. Rü norü poperawa rü nhanagürü: “¡Taxütáma nüxü penaguxchaxëxë i ngëma Yudéugü nax wena naxügüãxü ya yima Tupanapata! Rü ngëma noxrirüxü i nachicagu tátama nanaxügü. <sup>7</sup>¡Rü taxütáma penachixewe ya yimá Yudáanecüãxaru ãëxgacü rü ngëma togü i duüxügü i ngëma puracümaxá icuaxgüxü! <sup>8</sup>Rü nhüxüchi pemaxá nüxü chixu nax perü diërumaxá nüxü perüngüxëgüxü i ngëma Yudéugü i ngëma puracümaxá icuaxgüxü nax naxügüãxüçax ya yima Tupanapata. Rü ngëma diëru i perü naanewachigütama perü duüxügütanüwa ngüxü peyaxucümaxá tá nixí i paxa penaxütanüxü i ngëma Tupanapataarü mexëxë nax ngëmaãcü tama íyachaxächixüçax i ngëma puracü. <sup>9</sup>Rü ngëma chacherdótegü i Yerucharéüwa ngëxmagüxü rü chanaxwaxe i nüxna penamugü i ngëma wocaxacügü rü carnérugü i nanaxwaxegüxü nax naxçax yagugüãxü ya yimá Tupana ya dauxüwa ngëxmacü. ¡Rü naétü nüxna penaxá i trígutexe, rü wüü, rü yucüra, rü oríwaarü chfxü i wüxichigü i ngunexügügu rü tagutáma nixüye! <sup>10</sup>Rü ngëmaãcü tá nüxü natauxcha nax yimá dauxügüçü ya Tupanacax yagugüãxü i taxacü i namaxá nataãxëxü rü nhüxüchi çauxçax rü çauxacügüçax nayümüxëgüxüçax. <sup>11</sup>Rü ngëxguma chi texé tama naga ñnügu i nhaa chorü mu, rü name nixí i wüxi ya tümapataarü omüta tayaxu rü yimamaxá tüxü tapai nax ngëxma tayuxüçax ya yixema tama naga ñnüxe. Rü yima tümapata rü ngëxma narüxo rü naachinaxägüxica ngëma nayaxü. <sup>12</sup>Rü

yimá Tupana ya nüügüçax nüxũ unetacü ya yima ãane ya Yerucharẽũ rü tá nanachixexẽxẽ i ngexũrüüxũmare i nachixũane rüexna norü ãëxgacü i tama yanguxẽëxũ i nhaa chorü mu, rü nachixexẽëxũ ya yima Tupanapata. Rü chama i Darü nixĩ i chanaxunagüxũ i nhaa mu. Rü ngẽmacãx chanaxwãxe i aixcuma naga naxĩnue”, nhanagürü ga norü poperawa.

### Ningu ga Tupanapata

<sup>13</sup>Rü nüma ga Tanái ga taxtü ga Eufrátëarü oëstewaamaarü ãëxgacü rü Chetáru-Bonái rü norü ngüxëëruüügü rü paxama naga naxĩnue ga yema mu ga ãëxgacü ga Darü unagüxũ. <sup>14</sup>Rü yemaacü ga nüma ga yema Yudéugü ga yema puracümaxã icuãxgüxũ rü nayadaxëëgü ga nax napuracüexũ. Rü Tupanaarü orearü uruüügü ga Ayéu rü Yacaría ga Ídu nane rü Tupanaarü oremaxã poraãcü nanataãxëxëxẽ. Rü yemaacü ga guma Tupanapataarü mexëxë rü ningu yema Tupana nüxũ ixuxürüxũ rü yema Chíru rü Darü rü Artayére ga Pérchiaanecüãxaru ãëxgacügü unagügüxürüxũ. <sup>15</sup>Rü yexguma 6 ga taunecü ãëxgacü yixĩgu ga Darü ga Pérchiaanearü naanewa, rü yexguma nixĩ ga nax yanguxũ ga guma Tupanapata, meama adáaru tauemaciáaru tamaepüxaru ngunexügu (18 feweréru).  
.....

### Édra rü namücügümaxã

### Yerucharéüwa nangugü

**7** <sup>1</sup>Rü yexguma Artayére rü Pérchiaanecüãxaru ãëxgacü yixĩgu, rü nayexma ga wüxi ga chacherdóte ga

Yudéu ga Édragu ãégacü. Rü nüma rü nüxcümaãcü ga Aróütaxa nixĩ.

.....

<sup>6</sup>Rü nüma ga Édra rü wüxi ga nguxëëtaeruxũ nixĩ, rü meama nüxũ nacuãx ga Tupanaarü mugü ga Moiché ümatüxũ. Rü wüxi ga ngunexügu rü ãëxgacü ga Artayére naca nax Yerucharéüçax namueguaxüçax. Rü nüma ga ãëxgacü rü naga naxĩnü, yerü Tupana rü poraãcü Édraxũ narüngüxëë. Rü yemaacü ga Édra rü Babiróniaanewa inaxüãchi rü Yerucharéüçax natáegu. <sup>7-9</sup>Rü yexguma marü 7 ga taunecü ãëxgacü yixĩgu ga Artayére rü natáegu ga Édra. Rü namaxã nawoegu ga wüxütücumü ga Iraéutanüxügü. Rü yematanüwa nayexmagü ga chacherdótegü rü Lewítanüxügü, rü wiyætanüxügü, rü Tupanapataarü darüügü, rü Tupanapataaarü ngüxëëruüügü. Rü yemamaxã inaxüãchi ga Édra meama nüxíraxücü ga tauemaciáaru ügügu. Rü Yerucharéüwa nangugü meama guma norü 5 ga tauemaciáaru ügügu yerü Tupana rü poraãcü nüxũ narüngüxëë. <sup>10</sup>Rü nüma ga Édra rü aixcuma nagu narüxĩnü nax Tupanaarü mugüwa nangüxũ rü nagu nax namaxüxũ rü yema togü ga Iraéutanüxügüxũ nax nangüxëëxüçax ga yema Tupanaarü mugü. <sup>11-12</sup>Rü nüma ga Édra rü wüxi ga nguxëëtaeruxũ ga meama guxüma ga Tupanaarü mugüxũ cuácü nixĩ. Rü yexguma Babiróniaanewa inaxüãchichaxüxgu ga Édra, rü nüma ga ãëxgacü rü Édrana nanaxã ga wüxi ga popera ga nhaxũ: “Chama i ãëxgacü i Artayére rü cuxũ charümoxë Pa Chacherdóte, Pa Édrax. Rü cuma rü wüxi



i nguxẽtaeruxũ i meama Tupana ya dauxũguciarũ mugũxũ cuáxe quixĩ. <sup>13</sup>Rũ marũ chanaxunagũ i wũxi i mu nax ngẽmaácũ guxũma i Iraéutanũxũgũ i chãxmexwa ngẽxmagũxũ rũ naxwãxegũxũ nax cumaxã Yerucharéũcãx nawoeguxũ, rũ marũ name nax cuwe naxĩxũ. Rũ ngẽxgumarũxũ ta i ngẽma Lewítanũxũgũ rũ chacherdótegũ rũ marũ name nax nawoeguxũ. <sup>14</sup>Eruĩ chama i ãẽxgacũ, rũ ngẽma 7 i chorũ ngũxẽruũgũmaxã rũ ngẽma cuxũ tamu nax mea cuyangugũxũcãx nax nhuxãcũ ínamaxẽxũ i ngẽma cutanũxũgũ i Yudáanewa, rũ íane ya Yerucharéũwa, rũ ngoxi nagu ínamaxẽ i ngẽma curũ Tupanaarũ mugũ i cuxũ ngẽxmaxũ. <sup>15</sup>Rũ ngẽxgumarũxũ ta cuxna taxãga nax cuyanaxũcãx i ngẽma diêrumũ rũ úiru i chama i ãẽxgacũ rũ chorũ ngũxẽruũgũmaxã torũ ngũchaũmaxã cuxna taxãmaregũxũ naxcãx ya perũ Tupana ya Yerucharéũgu ãpatacũ. <sup>16</sup>Rũ ngẽxgumarũxũ ta rũ name nixĩ i cutanũxũgũ i duũxũgũ rũ chacherdótegũ i Babiróniaanewa ngẽxmagũxũtanũwa cunade i ngẽma diêrumũ, rũ úiru, rũ ãmaregũ i norũ ngũchaũmaxã inaxãgũxũ naxcãx ya yima Tupanapata ya Yerucharéũwa ngexmane. <sup>17</sup>Rũ ngẽma diêrumaxã rũ tá naxcãx cutaxe i wocaxacũgũ, rũ carnérugũ rũ carnéruxacũgũ wũxigu namaxã i ãmaregũ i trígu rũ wíũ. Rũ ngẽma ãmaregũ tá nixĩ i Tupanapataarũ ãmarearũ guchicaxũwa ícuyaguxũ i ngẽxguma Yerucharéũwa pengugũgu. <sup>18</sup>Rũ ngẽma diêru rũ úiru íyaxũxũmaxã rũ cuma rũ cumũcũgũ rũ tá naxcãx

petaxe i ngẽma pema nagu perũxĩnũegũ rũ Tupanaarũ ngũchaũ íxixũ. <sup>19</sup>Notũrũ ngẽma curũ Tupanapataarũ ngẽmaxũgũ i pexna taxãxũ rũ cunaxwãxe nax cumatama yima Tupanapatacu cuyanuxũ i Yerucharéũwa. <sup>20</sup>Rũ ngẽxguma iyataxũxgu i diêru naxcãx ya yima Tupanapata rũexna taxacũ i to i puracũ i Tupanacãx pexũxchaũxũ, rũ marũ name i chorũ diêruarũ daruxũxũtawã naxcãx ícuca. <sup>21</sup>Rũ pemax, Pa ãẽxgacũgũx i Taxtũ i Eufrátẽarũ Oéstewaama Ngẽxmagũxe i Diêrumaxã Icuãxgũxex, rũ chama i Pérchiaanecũãxaru ãẽxgacũ i Artayére rũ pexcãx chayamupane i nhaa mugũ: ‘;Rũ nüxna penaxã i guxũma i taxacũ i pexũtawã naxcãx ínacãxaxũ ya yimã chacherdóte ya nguxẽtaeruxũ ya Édra i meama Tupana ya dauxũcũãxaru mugũxũ cuácũ! <sup>22</sup>Rũ name nixĩ i nüxna penaxã nhũxmata 3,600 quíru naguxũ i diêrumũ rũ 22,000 lítru naguxũ i trígu, rũ 2,200 lítru nagucũ ya wíũ, rũ 2,200 lítru naguxũ i chíxũ. Rũ yimã yucũra ya nüma naxcãx ínacãxacũ ;rũ nüxna penaxã! <sup>23</sup>Rũ ngẽxgumarũxũ ta i ngexũrũxũmare i ngẽmaxũgũ i Tupana ya dauxũcũãx naxwãxexũ i napatacãx, rũ name nixĩ i nüxna penaxã nax tama chãxũcãx rũ chauncãx poxcu ínanguxẽxũ.’ <sup>24</sup>Rũ ngẽxgumarũxũ ta chanaxunagũ i nhaa mu: ‘Rũ ngẽma chacherdótegũ, rũ Lewítanũxũgũ, rũ wiyãetanũxũgũ, rũ íãxaru daruũgũ rũ guxũma i ngẽma togũ i Tupanapatawã puracũxũ, rũ tama chanaxwãxe nax ãẽxgacũaxũ nax naxũtanũgũaxũ.’ <sup>25</sup>Rũ cumax, Pa Édrax, rũ name nixĩ i nagu quixũ i ngẽma cuãx i Tupana cuxna ãxũ. Rũ ngẽmaácũ ngẽma naanegũ i taxtũ i

EufrátEARÜ oéstEwaama ngëxmagüxü i duüxüügüçax tá nüxü cuxuneta i ãëxgacügi i duüxügiüARÜ guxchaxüARÜ mexëëRUXÜ ixüGUXÜ, rü ãëxgacügi i mea ngëma duüxügiümaxã icuáxü. Rü ngëxguma nangemagu i duüxügi i tama curü TupanaARÜ mugüxü çaxgüxü, rü name nixi i cuma cunangüexëxë. <sup>26</sup>Rü ngexerüxüxemare ya tama naga Ìnuxe i ngëma curü TupanaARÜ mugü rü choriü mugü jrü noxtacüma tüxü pimax rüexna tüxü Ípetaxüchi i perü naanewa, rüexna tüxna penapuxü i tümaARÜ ngëmaxügi, rüexna tüxü pepoxcu!” nhanagürü ga ãëxgacü ga Artayëre norü poperawa.

#### ÉdraARÜ yumüxë

<sup>27</sup>Rü yexguma ga Édra rü nayumüxë rü nhanagürü: “Pa Torü QxigüARÜ Tupanax, rü cuma rü cumecümaxüchi. Rü ngëmacax ãëxgacüãëwa ícunangüxëxë nax yima cupata ya Yerucharéüwa ngexmane wena namexëëgiüaxüçax i curü duüxügi. <sup>28</sup>Rü moxë cuxna chaxã, Pa Tupanax, erü cuxü changechaütümüxü napëxewa ya ãëxgacü, rü ngëma 7 i namüciügi, rü guxüma i norü ngüxëëruügi. Rü chapora erü cumax, Pa Tupanax, chauxütawa cungexma rü ngëmacax choxü natauxcha nax nüxü chanangüchaüxëxëxü i nhuxre i chautanüxügi i IraëutanüxügiARÜ ãëxgacügi nax chawe Yerucharéüçax nawoeguxü”, nhanagürü ga norü yumüxëwa.

.....

#### TupanapatawaARÜ puracütanüxügi

**8** <sup>15</sup>Rü chama ya Édra rü natü ga Áwacutügi chanangutaquëxëxë ga yema duüxügi ga chamaxã

Yerucharéüçax woëguçaxüxü. Rü yexma tapegi ga tamaepüx ga ngunëxü. Rü yëma yoxni tayawügiéga ga duüxügi rü chacherdótegi ga yëma ngugüxü. Rü yemaacü nüxü tacuax rü nataxuma ga Lewítanüxü ga nüëchamatama yëma ixü. <sup>16</sup>Rü yemacax Erieçëçax, rü Ariëçax, rü Chemaíacax, rü Enatáüçax, rü Yaríçax, rü to i Enatáüçax, rü Natáüçax, rü Yacaríacax, rü Mechuráüçax changema, yerü nümagü nixi ga LewítanüxüARÜ ãëxgacügi yixixü. Rü yexgumarüxü ta naxçax changema ga Yoíaríbi rü Enatáü ga nguxëëtaeruügi ixüGUXÜ. <sup>17</sup>Rü Cachipíaarü Ìanewa chanamügi ga yema duüxügi nax LewítanüxüARÜ ãëxgacü ga Ídumaxã rü namüciügi ga ngüxëëruügi ga yema Ìanearü Tupanapatawa puracüëxümaxã yanadexagüxüçax, rü namaxã nüxü yaxugüxüçax nax toxütawa namugüaxüçax i Lewítanüxügi nax yima Tupanapata ya Yerucharéüwa ngexmanewa toxü nangüxëëgiüxüçax. <sup>18</sup>Rü Tupana rü tomaxã namecüma, rü yemacax toxütawa nanamu ga Cherebía ga meama poperaxü cuácü ga Lewítanüxü ga Marítaxa ixüci. Rü nüma ga Cherebía rü toxütawa nangu wüxigu namaxã ga nanëgi rü naeneëgi ga meama 18 ga duüxügi ixüGUXÜ. <sup>19</sup>Rü yexgumarüxü ta Tupana yëma nanamügi ga Achabía namaxã ga namüciü ga Yechaía ga Merári nane ixüci. Rü namaxã Ìnangügi ga nanëgi rü naeneëgi ga meama 20 ga duüxügi ixüGUXÜ. <sup>20</sup>Rü naëtüwa rü Ìnangügi ga 220 ga TupanapatawaARÜ ngüxëëruügi. Rü nüxüma rü ãëxgacü ga Dawí nixi ga

yemaacü inanücü naxçax ga  
 Tupanapataarü puracü. Rü guxüma ga  
 yema 220 ga ngüxêruüğü rü nayawüğü  
 ga naégagü. <sup>21</sup>Rü yemawena rü  
 chanaxunagü nax aureäcü  
 tayumüxëgüxü natü ga Áwacutiwa nax  
 Tupanamaxâ nüxü tixugüxüçax ga torü  
 chixexüğü, rü Tupanana naxçax  
 tacaxaxüçax nax mea toxü  
 naxüpetüxüçax i namawa, rü toxna rü  
 toxocüguna nadauxüçax wüxigu  
 namaxâ i guxüma i torü ngëmaxüğü i  
 namaxâ itaxixü. <sup>22</sup>Yerü chorü äne nixi  
 ga äëxgacüxütawa naxçax ichaçaxaxü  
 ga churaragü ga cowarugu İxü nax torü  
 uanüguna toxü İnapoxüxüçax i namawa,  
 yerü yexguma taxüta itaxiächigu rü  
 marü äëxgacümaxâ nüxü tixugü nax  
 Tupana tüxü rüngüxêëxü ya yixema  
 naxçax daugüxe, notürü tüxü napoxcu  
 ya guxâma ya tama naga İnüexe. <sup>23</sup>Rü  
 ngëmacax aureäcüma tayumüxëgü rü  
 Tupanana tacagüe nax toxna  
 nadauxüçax. Rü nüma rü aixcuma toxü  
 nangaxüga.

.....

<sup>31</sup>Rü natü ga Áwacutiwa itaxiächi  
 meama nüxiraxücü ga taumacüarü 12  
 arü ngunexügu nax Yerucharéüwa  
 taxixü. Rü Tupana rü namawa toxna  
 nadau rü toxü İnapoxü nüxna ga torü  
 uanüğü rü ngítaaxgüxü. <sup>32</sup>Rü yexguma  
 Yerucharéüwa tangugügu, rü tamaepüx  
 ga ngunexü tarüngüğü.

.....

<sup>35</sup>Rü yemawena rü wüxichigü ga  
 toma rü naxüna İtagu naxçax ga gumá  
 torü Tupana. Rü guxüma ga  
 Iraéutanüxügüégagu rü İtanagu ga 12  
 ga wocaxacüğü rü 96 ga carnérugü rü

77 ga carnéruxacüğü. Rü torü  
 chixexügüarü İtanüruxü rü İtanagu ga  
 12 ga bóyigü. <sup>36</sup>Rü toma rü yema  
 nachixüanegü ga taxtü ga Eufrátearü  
 oéstewaamaarü äëxgacüguna tanaxâ ga  
 yema popera ga Pérchiaanecüaxarü  
 äëxgacü toxna äxü. Rü nümagü rü paxa  
 toxü narüngüxêë nax wena tanaxüxüçax  
 ga guma Tupanapata.

**Édra rü Tupanamaxâ nüxü nixu ga  
 Iraéutanüxügüarü chixexü**

**9** <sup>1</sup>Rü yemawena ga yema  
 Iraéutanüxügüarü äëxgacüğü ga  
 marü nüxıra Yerucharéüwa ngugüxü rü  
 çaxçax naxi rü chamaxâ nüxü  
 nayarüxugüe rü nhanagürtüğü:  
 “Muxüma i ngëma tatanüxügü i  
 Iraéutanüxügü ga nüxıra tomaxâ  
 woeguxü, rü woo chacherdótegü rü  
 Lewítanüxügü rü tama nügüxü nüxü  
 naxoxoxgü i nacümagü i chixexügü i  
 nagu naxixü i ngëma togü i duüxügü i  
 nua tóru naanegu yaxächüügüxü. Notürü  
 ngëma tatanüxügü rü woo poraäcü  
 Tupanapexewa nachixe nax ngëma  
 togücümagu nax naxixü, notürü nagu  
 naxifama i nacümagü i ngëma  
 Canaáatanüxügü rü Etéutanüxügü, rü  
 Ferechéutanüxügü, rü  
 Yebuchéutanüxügü, rü Amóutanüxügü,  
 rü Moábitanüxügü, rü Eyítuanecüaxgü,  
 rü Amuréutanüxügü. <sup>2</sup>Yerü nüma i  
 tatanüxügü rü nanegü rü marü  
 nixäxmaçgü namaxâ i ngëma togü i  
 duüxügüxacüğü i nua tóru naanegu  
 yaxächüügüxü i tama Tupanaaxü  
 yaxögüxü. Rü yemaacü ga Tupanaarü  
 duüxügü rü yema tama yaxögüxü ga  
 duüxügümaxâ nügü narüxücutanü. Rü

tatanüxügü i ãëxgacügü nixĩ ga nüxíra inaxügüxũ nax nagu naxĩxũ ga yema chixexũ”, nhanagürügü choxũ. <sup>3</sup>Rü yexguma yema orexũ chaxínügu rü chorü ngechaũmaxã chaugü charügáutechiru rü chaugü chapuxũyáe rü chaugü chapuxũchinágu, yerü poraãcü chauãëwa nangux ga yema. <sup>4</sup>Rü guxũma ga yema Iraëutanüxügü ga norü Tupanaarü poxcucax muüexũ nagagu ga natanüxügüarü chixexügü rü chauxũtawá nayarütogü. Rü chama rü chorü ngechaũmaxã yematama chauchicawa charüto nhuxmata nawa nangu ga yema yáuanecüarü ora ga nagu Tupanacax yagugüãxũ ga ãmaregü. <sup>5</sup>Rü yexguma yema orawa nanguxgu rü marü choxũ nangupetüxüra ga nax changechaũxũ. Rü charügáuchiruãcuma ichanaxügü nax chayumüxëxũ. Rü Cori ya Tupanamaxã chidexa. <sup>6</sup>Rü nhachagürü nüxũ: “Pa Chorü Tupanax, Pa Chorü Tupanax, rü poraãcü chaxãnexũchi i cupëxewa. Rü tama nüxũ chacuax nax taxacü chaxüxũ rü nhuxãcü cumaxã chidexaxũ. Erü ngëma torü chixexũ rü marü nangupetüxüchiamá rü ngëma torü pecádugü rü marü nhama i naane namaxã nanapá. <sup>7</sup>Rü nüxcümacürüwa ga torü oxigü rü chixexũgu namaxë rü nhamaxũcüxü i toma rü ta nagu ítamaxë. Rü ngëma torü chixexũgagu rü toma rü torü ãëxgacügü rü torü chacherdótegü rü naxmëxgu tayi i ngëma to i nachixũanecüãxgüarü ãëxgacügü i tama cuxũ yaxögüxũ. Rü nümagü rü toxũ ínayauxũ rü toxcax nangixgü rü duũxügüpëxewa toxũ nacugüe. Rü ngëmatama nixĩ i nhuxmax

toxũ ngupetüxũ. <sup>8</sup>Notürü i nhuxmax, Pa Corix, Pa Torü Tupanax, rü ngëma nax tomaxã cumeçumaxũgagu rü toxũ cunatauxchaxëxë nax nhuxre i toma rü wena nhaa naane i cuma cuxüünexëxũcax tawoeguxũ nax nagu taxãchiügüxũcax. Rü cuma rü wüxi i ngexwacaxxũ i ínü toxna cuxã, rü ngëmaãcü paxaãchi toxũ cutaãxëxëxë naëtüwa i torü guxchaxũgü. <sup>9</sup>Rü woo to ga ãëxgacümëxëwa nax tangëmagüxũ notürü i cumax rü tama toxũ ícuwogü. Rü ngëma Pérchiaanecüãxarü ãëxgacügüãëwa ícunanguxëxë nax tomaxã nameçumagüxũcax. Rü toxna cudau nax nhuxmax rü ta tamaxëxũcax, rü ngëmaãcü tawoeguxũcax, rü wena noxrixüxũ ga nachicagutama tanaxüxũcax ya yima cupata. Rü cumax, Pa Tupanax, rü toxna cudau i guxũma i nhaa naane i Yudáanewa rü daa ñane ya Yerucharéüwa. <sup>10</sup>Notürü i nhuxmax, Pa Tupanax çrü taxacüxũ tá cumaxã tixuxũ nawena i guxũma i ngëma chixexũ i taxüxũ. Erü aixcuma nixĩ nax tama naga taxínüexũ i curü mugü”, nhachagürü ga chorü yumüxëwa.

.....

**Yudëgü rü ínanawoxũ ga yema  
ngëxügü ga to ga  
nachixũanecüãxgü ixígüxũ**

**10** <sup>1</sup>Rü yexguma nhaxtúanegu chayangücuchigu norü toxmãxtawa ga guma Tupanapata, rü yéma chaxauxãcuma chayumüxë, rü Tupanamaxã nüxũ chixu ga torü chixexügü. Rü yexgumayane yéma nangugü ga muxũma ga yatügü rü ngëxügü rü buxũgü rü chauxũtagu

nanguataq̄xe rü wüxigu chamaxã  
 naxauxe. <sup>2</sup>Rü yexguma nüma ga  
 Checanía ga Yerié nane ga Eráútanüxü  
 ixícü rü nhanagürü choxü: “Rü aixcuma  
 nixí i Tupanap̄exewa chixexü ixügüxü.  
 Erü ngexügü i to i nachixüanecüãx  
 ixügüxü i tama Tupanaaxü  
 yaxögüxümaxã tixãx̄maxgü i yixema i  
 Iraéutanüxügü. Notürü nangexmaama  
 nax nhuxãcü Tupanap̄exewa namexêêxü  
 i ngêma torü chixexü. <sup>3</sup>Rü ngêmac̄ax  
 tórü Tupanap̄exewa tá nüxü tixu nax  
 tixna tixigachixüçax ya yixema  
 tox̄maxgü ya tama Tupanaaxü yaxögüxe  
 rü yixema toxocügü ya tümawa toxü  
 ngêxmagüxe. Rü ngêmaãcü ngêma  
 cuma rü ngêma togü i duüxügü i  
 aixcuma Tupanaga inüexü tomaxã nüxü  
 ixuxürüxü tá naga taxinüe ya tórü Cori  
 ya Tupanaarü mugü. <sup>4</sup>Rü inachi rü  
 naxü i ngêma Tupana cuxü muxü nax  
 cunaxüxü! Rü toma rü tá cuga taxinüe.  
 j̄Ëcü tomaxã nüxü ixu nax nhuxãcü tá  
 tanamexêê i ngêma chixexü i taxüxü!”  
 nhanagürü.  
 .....

<sup>10</sup>Rü yexguma ga chama ga  
 chacherdóte ya Édra rü ichachi rü  
 nhachagürü: “Pema rü poraãcü chixexü  
 pexü erü namaxã pexãx̄maxgü i ngêma  
 ngexügü i to i nachixüanecüãx ixügüxü.  
 Rü ngêmaãcü penayexeraxêê i tórü  
 chixexügü i Tupanap̄exewa. <sup>11</sup>Rü  
 nhuxmax rü penaxwaxe i tórü oxigüarü  
 Tupanap̄exewa penaxü i ngêma nüma  
 nanaxwaxexü rü nüxü pexu nax  
 aixcumama chixexü pexügüxü. Rü  
 ngêmac̄ax pemaxã nüxü chixu j̄rü  
 nüxna pexigachi i ngêma duüxügü i  
 tama yaxögüxü rü ngêma ngexügü i to i  
 nachixüanecüãxgü ixügüxü!”  
 nhachagürü. <sup>12</sup>Rü yexguma yemaxü  
 naxinüegu ga guxüma ga yema duüxügü  
 rü tagaãcü nanangãxügü rü  
 nhanagürügü: “Ngemáacü tá tanaxü i  
 ngêma toxü cumuxü”, nhanagürügü.  
 .....

<sup>44</sup>Rü guxüma ga yema Iraéutanüxügü  
 ga to ga nachixüanecüãx ga  
 ngexügümaxã ixãx̄maxgüxü rü  
 tümangatügüçax tixü nawoeguxêê  
 wüxigu tümamaxã ga tümamacügü.